

[Augsburg], 15. Mai [1572]

An Matthias Ritter d. J.

Abschrift: Staats- und Universitätsbibliothek Hamburg, Sup. ep. 2, fol. 151r-152r (S. 285-287, Nr. 124).

Sal[utem]. Succensui valetudini meae Humanissime D. Matthia, quod ne per hospitem meum literis tuis amantissimis respondere non passa esset, Ita enim mecum sive λιθίασις siue δυσουρία, siue utraque simul excarnificabat, ut dolores et gemitus unica mea actio essent: ac vix hac ipsa hora idem malum exiguum respirandi spatium mihi concessit. Cum enim Stenglius mercator post nondinas salutem tuo nomine dixisset et in mittendis per occasionem ad Te literis benigne operam suam obtulisset: quamuis seriò respondendum esse duxi. At primum gratissima mihi est memoria mei tua, et constans amicitiae fides, quam in perpaucis reperio, desidero in multis, qui adeo me non moverant literis, ut ne lacessitae quaedam respondeant, Deinde felix et faecundum coniugium Tibi tam ex animo gratulor quod idem institutum consequi me aetas et valetudo prohibet. Alo ancillulam satis commodam et peritam rei familiaris, et adolescentulum amanuensem. Haec mea uxor, hi mei liberi sunt, meque non tam ut herum quam ut patrem observant et diligunt. Plura non requiro, iam olim τὸν λόγιον ἔρμῶν (!) ἀντὶ τῆς χρυσῆς ἀφροδίτης complexus, sed per literarum studia languescit aetas meque rude iam tandem post tot et tantos labores exantlatos donandum esse, clamitat, postulat, flagitat. Quod si essem firmior atque alacrior, et epira (!) mea in vertendis sacris requirerentur, tantò libentius in eo genere elaborarem, quantum sacra profanis antecellunt. Nunc longissimi mei studii decursu et recursu multiplici defatigatus, aliis lampada trado: meque fungi officio abundè existimo, si praeter scholasticas operas τὰ περὶ τῆς ἐνθέν τε μετοικεστὰς (!) καὶ τὸ ἐν οὐρανοῖς πολίτευμα, audiam, legam, mediter. Quo ut clementia diuina IESU CHRISTI seruatoris nostri fiducia nos perducat, oro, opto, spiro (!). Tu interim et ecclesiae tuae et familiae feliciter praeesto nostri memor, ut nos tui. Vale Idibus Maii.

Hiero[nymus] Wolfius  
ex animo Tuus.